

**LITURHIYA
KON WARAY PADI
HA ADLAW NGA
DOMINGO**

LITURHIYA KON WARAY PADI
HA ADLAW NGA DOMINGO

Ini nga **Liturhiya kon Waray Padi ha Adlaw nga Domingo**
asya an ginagamit ha Diocese of Borongan.

Kun PDF | Paper size: A5 (1/2 of A4 paper)

Kun may-ada mga sayop dida hini nga rito alayon pag-email:
pagampokita@gmail.com

www.pagampokita.com

AN NAHISULOD

I. RITO HA PAGTIKANG

AWIT HA PAGTIKANG

RITO HAN PAGBASOL

II. LITURHIYA HAN PULONG

PAGPASIDUNGOG HAN SANTOS NGA KASURATAN

SYAHAN NGA PAGBASA

SALMO RESPONSORIO

IKADUHA NGA PAGBASA

ALLELUIA

EBANGHELYO

WALI

PAGTUG-AN HAN PAGTOO

PAG-AMPO HAN BUNGTO

III. AN SANTOS NGA PAGKARAWAT

PAGSINGBA HAN SANTISIMO SAKRAMENTO

PAG-AMPO HIN PAGDAYAW UG PAGPASALAMAT

AMAY NAMON

PAGKARAWAT HAN MGA TAWO

PAG-AMPO HUMAN PANGARAWAT

PAGHALAD

IV. RITO HAN PAGTAPOS

LITURHIYA KON WARAY PADI HA ADLAW NGA DOMINGO

I. RITO HA PAGTIKANG

AWIT HAN PAGTIKANG

Kon tirok na an mga tawo, an ministro upod an magbarasa nga nakadara han Basahan han Santos nga Kasuratan (Biblia), napasingadto ha altar. Naluhod hiya ha atubangan han Santisimo (kon ginhipos ine didto ha kapelya), ngan nayukbo ha atubangan han altar, samtang an mga tawo magkakanta. Ibubutang han magbarasa an Basahan han bawbaw han altar ngan an ministro, sugad man an magbarasa, napakadto ha ira lingkuranan.

An ministro upod an mga tawo nangungudos upod an pagsering:

**Ha ngaran han Amay ug han Anak +
ug han Espiritu Santo. Amen.**

**Mga kabugtuan ko,
gin-aabiabi ta kamo ha ngaran
han aton Ginoo Jesucristo.
Aanhi hiya upod ha aton
kay nagsering hiya ngahaw,
“kon magkatirok in duha
o tulo ha akon ngaran,
aada ako kaupod ha ira.”**

Kon ini

**Akon kabugtuan,
gintirok kita ni Cristo
dinhe nga iya bungto
hin pagsingba han langitnon nga Amay.
Ha ngaran han aton Cura Parroco, hi **N.**,
gin-aabiabi ta kamo
nganhi hini nga Pagsaurog.**

Kon ini

**Akon kabugtuan,
nag-aabiabi ha aton an Ginoo**

hin pamati han iya Pulong
ngan hin pakaangbit
dida hine nga sakramento
han iya gugma.
Dayawon ta hiya tungod
han iya mapuanguron nga gugma.

RITO HAN PAGBASOL

Ministro:

Dida ha pagbunyag,
namatay kita han sala
ngan nahimo kita
nga bag-o nga gintuha han Dios;
kundi kon makasala kita
hi Cristo dire nahunong
hin panginyupo sa Dios
tungod ha aton.
Pangaro kita sa Dios
nga pasayloon an aton mga sala
basi mahingpit an kalipay
han aton pagsaurog
ha adlaw han Domingo.

Nagtutug-an ako
ha makagarahum nga Dios
ug ha iyo, akon kabugtoan,
kay nakasala ako han hunahuna,
pulong, buhat ug pagpasibaya:
(mapukpok ha dughan)
tungod han akon sala, akon sala,
han akon dako nga sala.
Sanglit nangangamaya ako
kan Santa Maria Virgen,
han mga anghel ug mga santos,
ug ha iyo, akon kabugtoan,

**nga ig-ampo ako niyo
ha aton Ginoo nga Dios.**

Kahuman han Rito han pagbasol, an tigaman han kalinaw ihahatag ngadto han mga tawo sugad han nababatasan.

Ministro:

**Ipakita ta yana nga an kamurayaw
naghahadi dinhi ha aton.**

II. LITURHIYA HAN PULONG

PAGPASIDUNOG HAN SANTOS NGA KASURATAN

Natukdaw an mga tawo. An ministro napakadto ha altar, naharok han Santos nga Kasuratan ngan nasing:

**Akon kabugtoan,
pagpasidunggi ta
an Santos nga Kasuratan
basi an pagturon-an
nga nahatag hin kapawa ha aton
mahipatik dinhe ha aton hunahuna
ug kasingkasing.**

Binabayaw han ministro an Basahan han Santos nga Kasuratan ngan an mga tawo hin hilom nagpapasidungog han Basahan o kon di' man may-ada kanta.

SYAHAN NGA PAGBASA

Kahuman, ihahatag an Basahan ngadto han Magbarasa,. Binabasa an Pulong pinangungunahan hine nga mga pulong:

Pagbasa kinuha dida...

Kahuman pagbasa:

An pulong han Ginoo.

Katirok:

Salamat sa Diyos.

SALMO RESPONSORIO

IKADUHA NGA PAGBASA

Magbarasa:

Pagbasa kinuha dida...

Kahuman pagbasa:

An pulong han Ginoo.

Nabaton an tawo:

Salamat sa Diyos.

ALLELUIA

An ngatanan natukdaw hin pagkanta han alleluia o kon panahon han Adviento o kwaresma, usa nga aklamasyon kinuha dida han ebanghelyo.

EBANGHELYO

An ministro ngahaw an nabasa han ebanghelyo. Nasing hiya:

Pagbasa kinuha dida han ebanghelyo nga sinurat ni N.

Katirok:

Paghimayaon ka, Ginoo.

Kahuman pagbasa han ebanghelyo:

An maupay nga sumat han aton Ginoo.

Katirok:

Pagdayawon ka, Cristo.

WALI

Kahuman han ebanghelyo, babasahon han ministro an gin-andam nga Wali han Cura parroco o kon di' man, igpapaangbit han ministro an iya ginpamalandong bahin han ginbasa.

PAGTUG-AN HAN PAGTOO

**Natoo ako han Dios,
Amay nga makagarahum han ngatanan,
magburuhat han langit ug han tuna,
ug kan Jesuscristo, Iya bugtong
nga Anak ug aton Ginoo;
Nga iginpanamkon
ha larang ha Espiritu Santo,
igin-anak ni Santa Maria Virgen
iginsakit ha sugo ni Poncio Pilato,
iginraysang ha krus,
namatay ngan iginlubong,
linmusad ha mga infierno.
Ha ikatulo ka adlaw
nabuhi liwat dida ha mga minatay.
Sinaka ha langit,
nalingkod ha tuo han Dios Amay
nga makagarahum han ngatanan.**

**Tikang didto makanhi liwat
kay maghuhukom
han mga buhi ug mga patay.
Natoo ako han Dios Espiritu Santo,
han Santa Iglecia Catolica,
han pagkaanbitan han mga santos,
han pagwara han mga sala,
han pagkabuhi han mga lawas
ug han kinabuhi nga dayon.
Amen.**

PAG-AMPO HAN BUNGTO

Kahuman han wali, isusunod an pag-ampo han Bungto. Ini nga nga pag-ampo nag-uupod han mga panuyo han bug-os nha Singbahan, han mga pamuno-an, hadton mga nagkikinahanglan ngan han kasurok'an han katilingban.

III. AN SANTOS NGA PAGKARAWAT

PAGSINGBA HAN SANTISIMO SAKRAMENTO

Naluhod an mga tawo. Kukuhaon han ministro an Santisimo Sakramento dido han dapit nga ginhipusan, ibubutang ha altar nga nasering:

**Mga kabugto-an ko,
pagsingba kita
han aton Ginoo Jesucristo
nga aanhi kausa naton
dida han Santisimo Sakramento
nga itinubyan ha aton nga usa nga sakramento han
gugma,
tigaman ha aton pagkaurosa
ug gapos han paghigugma.**

Inaalsa han ministro an santisima samtang nagsisingba hin hilom an mga tawo omay-ada kanta.

PAG-AMPO HIN PAGDAYAW UG PAGPASALAMAT

Kahuman pagsingba han Santisimo, natukdaw an mga tawo ngan an ministro mag-aampo hini nga masunod:

**Dios nga amon Amay,
amo ini an adlaw nga an imo Anak
ug amon Ginoo Jesucristo,
nabanhaw ha mga minatay
ngan nagdara hin kalipay
nganhi ha kalibutan.
Amo ini nga adlaw nga nagpakita hiya
hin mga pulong hin paglaom ug paglipay
ngan ihinatag ha ira an iya kalinaw.
Amo ini nga adlaw nga nakigsaro hiya
ha iya mga tinun-an
ngan nagpakilala hiya
dida han pagpinitpinit han tinapay.
Sanglit nasering kami:
himaya ug pagdayaw ha imo, O Diyos.**

Katirok:

Himaya ug pagdayaw ha imo, O Diyos.

Ministro:

**Amay namon,
pagkadako han imo gugma ha amon!
Kon an amon pagkatirok harayo
han katig-uban han amon parokya,
diri ka nabaya ha amon,
diri nimo sinasalikway
an imo gugma ha amon!
Nagdadayaw ug nagpapasalamat
kami ha imo tungod
han mga hatag mo ha amon
yana nga adlaw,
tungod han pulong han kalinaw
ngan tungod han tinapay han kinabuhi.
Sanglit nasiring kami;
Himaya ug pagdayaw ha imo, O Diyos.**

Katirok:

Himaya ug pagdayaw ha imo, O Diyos.

Ministro:

**Tungod han mapuanguron nga gahom
han Espiritu Santo,
magdilaab unta
an amon mga kasingkasing.
Mahinumdum unta kami
han gintutdo han imo Anak
dida han Santos nga Kasuratan
ngan kumilala unta kami ha iya
dida han Santisimo Sakramento ha altar.
Sanglit nasiring kami:
Himaya ug pagdayaw ha imo, O Diyos.**

Katirok:

Himaya ug pagdayaw ha imo, O Diyos.

Ministro:

**Upod an amon Obispo, hi N.,
an amon Cura Parroco, hi N.,
ngan an Singbahan nga nakakalukop
han bug-os nga kalibutan,
gindadayaw ug ginpapasalamatan
ka namon, Diyos nga amon Amay,
pinaagi han imo Anak,
an amon Ginoo Jesucristo,
nga buhi ug nagahadi
upod ha imo ug han Espiritu Santo,
uusa nga Dios, ha dayon nga mga katuigan.**

Katirok:

Amen.

AMAY NAMON

Kahuman han Pag-ampo han Pagdayaw ug Pagpasalamat, pangungunahan han ministro an pangadi han Amay Namon:

**Pag-ampo kita upod an pagtapod
ngadto han Amay
dida hini nga pulong
nga ihinatag han Manunubos ha aton.**

**Amay namon, nga aada ka mga langit;
Pagdayawon an imo ngaran;
Ikanhi mo ha amon an imo ginhadian,
Ipasunod an imo pagbuot dinhi ha tuna,
sugad han pagsunda didto ha langit.
Tagan mo kami niyan
han karan-on namon ha ikaina-adlaw;
Pagwad-on mo an amon mga sala
sugad han pagwara namon han nakasala ha amon;
ngan diri mo kami bayaan,
basi diri kami pagdag-on han mga panulay,
kundi bawia kami ha karat-an.**

Ihatag dinhi an tigaman han kalinaw, kon waray pa buhata ini didto han rito han pagtikang.

Ministro:

**Ipakita ta yana nga an kamurayaw
nga naghahadi dinhi ha aton.**

PAGKARAWAT HAN MGA TAWO

Nagkakaluhod an mga tawo, naluhod an ministro; kakaptan niya an ostiya ngan aalsahon ha bawbaw han ciborio ngan nasering hin dako nga tingog:

**Iini an Kordero han Diyos
nga nagkukuha
han mga sala han kalibutan.
Baraan adton gintatawag
ngada han iya sasaro.**

Katirok:

Ginoo, diri ako takos hin pagkarawat ha imo;
kundi pagluwas la hin Pulong,
ngan mag-uupay ako.

Dida ha pagkarawat han mga tawo, maupay kon may – ada kanta.

PAG-AMPO HUMAN PANGARAWAT

Natukdaw an mga tawo, nag-aampo an ministro:

**Diyos nga amon Amay,
ginpakaon nimo kami
han tinapay han kinabuhi.
Igbuot nga tumubo kami
sugad hin usa nga katilingban
nga nagkakaurosa dida hin paghigugma
ug panginlabot han amon igkasitawo.
Pinangangaro namon ini pinaagi kan Jesucristo nga
amon Ginoo.**

Katirok:

Amen.

PAGHALAD

Kahuman hini nga pag-ampo, an ministro nagaabiabi han mga tawo hin paghalad han ira mga hatag para han mga kabras ug kasurok'an han katilingban.

Pagkahuman han paghalad, mahihimo nga kantahan an imno han baranggay kon di' man an imno han parokya.

IV. RITO HAN PAGTAPOS

Ministro:

**Mga kabugtoan ko kan Cristo,
yana nga nagsaurog kita han kamtayon
ug kabanhaw han aton Ginoo, Jesucristo,
pagkalakat kita ngan ipasangyaw ta
an Pulong nga aton hinbatian
ngan magkinabuhi kita
dida han espiritu han sakramento
nga aton kinarawat.**

**Bendisyonan kita
han makagarahum nga Dios,
Amay ug an Anak ug Espiritu Santo.**

Katirok:

Amen.

Ministro:

**Kalakat kita nga malinawon
han paghigugma
ug pag-alagad han Ginoo.**

Katirok:

Salamat sa Dios.



pagampokita.com